



NORPIPAH (tengah) bersama pemimpin serta komuniti setempat mencurahkan larutan air bioteknologi ke Sungai Melaka pada Program Kesedaran Alam Sekitar Bersama Komuniti di Taman Rekreasi Sungai Melaka, di Kampung Pengkalan.

JPS diminta kerap bersih saluran

Parit tersumbat halang pergerakan air, sekali gus sebabkan banjir kilat

Oleh Shukor Kasim
bhnews@bharian.com

ALOR GAJAH: Kerajaan negeri meminta Jabatan Pengairan dan Saliran (JPS) meningkatkan kerja pembersihan di kawasan sistem perparitan seliaannya bagi mencegah banjir kilat, terutama musim hujan.

Pengerusi Jawatankuasa Hal Ehwal Wanita, Pembangunan Keluarga dan Kebajikan negeri, Datuk Norpipah Abdol, berkata sistem perparitan yang tidak bersih dan tersumbat akan menghalang laluan air ketika musim hujan, sekali gus menyebabkan kawasan sekitarnya boleh dinai ki air.

Beliau berkata, selain JPS, pemimpin setempat bersama komuniti masing-masing perlu



Jika semua pihak saling bekerjasama serta menjalankan peranan masing-masing membersihkan kawasan persekitaran dan sistem pengairan, saya yakin ia mampu mencegah dan mengurangkan risiko banjir **99**

Norpipah Abdol

Pengerusi Jawatankuasa Hal Ehwal Wanita, Pembangunan Keluarga dan Kebajikan negeri

bekerjasama melaksanakan program gotong-royong bagi menghalang kejadian sama berlaku.

“Jika semua pihak saling bekerjasama serta menjalankan peranan masing-masing membersihkan kawasan persekitaran dan sistem pengairan, saya yakin ia mampu mencegah dan mengurangkan risiko banjir,” katanya.

Beliau berkata demikian ketika ditemui pada majlis Program Kesedaran Alam Sekitar Bersama Komuniti (PKASBK) di Taman Rekreasi Sungai Melaka di Kampung Pengkalan, dekat sini, kelmarin.

Sempena program itu, turut diadakan pameran serta demonstrasi pemuliharaan dan pemeliharaan alam sekitar kepada penduduk setempat.

Hadir sama Timbalan Pengarah

JPS, Ahmad Solihin Budiarto.

Norpipah yang juga Ahli Dewan Undangan Negeri (ADUN) Rembia, turut memuji langkah JPS melaksanakan PKASBK bagi meningkatkan kesedaran masyarakat mengenai betapa penting mencintai dan menjaga kebersihan sungai.

“Aktiviti dan kempen menjaga kebersihan sungai adalah tanggungjawab bersama agensi kerajaan dan komuniti kerana air sungai adalah antara sumber tenaga utama kepada manusia.

“Program ini selaras ke arah Melaka negeri maju dan bandar teknologi hijau yang sedang giat dilakukan kerajaan negeri. Kempen menyedarkan masyarakat supaya mementingkan kebersihan dan keindahan sungai perlu diterapkan kepada semua golongan sejak kanak-kanak lagi,” katanya.